

## Бугримов Георгий Дмитриевич

### Лэч туй

-Аски асывводз кайла вөрө лэч туй кыйны, - висьталіс бать.

-Батьö, ме тшöтш тэкöд ветла, - сьöлöмсянь вöзйыси ме.

Батьöй шензьыштис, но шуис:

- Бур, сöмын водз чеччыны ковмас, чуксала да, мед сёысь эг шу.

Баба гожöм локтис миян грездö. Луньяс сулалісны шоныдöсь, эз зэрлась, сöмын небыдик төвру легöдіс пу вылысь корьяс, и найö бобувьяс моз шлавгысисны вижöдöм турун вылö. Майбыр да и сöмын!

Шондіыс асывсянь вильшасис югөрьяснас, быттьökö чуксаліс: «Чеччы нин, Ваня, а то батыд коляс». Ме звиркниті-чеччи, часі вылын вöлі нель час. Керкаын чöv-лөнъ, батьöй узьö на. Синмöй сэсся эз нин куньсьыв, полі, мый ланьта да ог паляв. Недыр мысти чеччис бать да босьтчис дасьтыны ноп. Гусьöникöн, мед не пальöдны гортсаясöс, юим копе, нурьясьыштім да заводитім пасьтасьны.

- Ваньö, мун котортлы посводзö, пыранінас стенмас öшалö лазйöй, вай сійöс, - шуис бать.

Нинöм юавтöг ме сюся котöрті, видзöда, а сэні стен пöлöныс вель унатор öшалö.

- Мый бара сійö лазйыс-а? - вöлисти воис юрö, быттьökö мөдöдігас эг вермы юавлыны.

Видзöдалі ставсö, а сэсся босьті кутшöмкö мөтök. Тайö, мися, кöнкö, лазйыс. Вайи да сеті батылы. А сійö видзöдліс ме вылö да кутис гораа серавлыны.

- Но тэ жö эськö Ванька да, серам петкöдлысь, лазсö öд пасьталöны, а тэ гез вайöмыд. Мый нö лэч туй вылас сійöн вöчан? Он öд лэчсö таысь гартышт. Лок ветлам да босьтам.

Бать петкöдліс, мый сійö лазйыс. И збыльысь кöлуй, жилет кодь. Меным весиг яндзим лои, ог тöд да. Со пö öд важ йöзыд кутшöм бур пасьталантор

мөвпыштлөмаось. Кучикысь, мед он көтась, патроньяс пуктыны места эм, бокас позьö лэчьяс öшөдны, тасмаасян да, костас чер суйыштны, и абу сьöкыд.

Пасьталіс лазсö, да менам син водзын быттьö кутшöмкö преданиеысь герой сувтіс. Нопйö пуктіс термосын пось тшай, нянь, пельпом вылас öшөдіс пишаль, лэдзис Тайга поннымös, и мөдөдчим. Ме, дерт, рытсаяныс неуна дасьтысьышти жö. Мамöй тшөктіс босьтны шоколад. Вöрад пö ёна мудзöм бöрад верман лигыштны, выныд муннытö оз ло, а шоколадтö сёйыштан да, содыштас. Тадзи сійöс велөдлөма ыджыд батьöй, коді вөрватö гежмавлөма абу öти во. Батьтöгыд быдмигад дас арөссянь матігögör вöрад лэчьястö вөлөм пуктывлö. Буретш сылөн лэч туй вылö талун ми и мөдөдчим.

Водзын лэч туй кольлөмаось пияныслы, а менам ыджыд батьöй петкөдлөма мамöлы, а сэсся сійö - батьöлы, көть эськö и куим пи сылөн вөлөма. Ныристөмось пö кыйсьынысö. Со и кыйö öні менам бать. Чойöй кайлывлö жö октысьны да кыйны, а ме медводдзаысь вöзйыси и думысь виччыси мыйкö шемöсмөданатор.

Мыйөн пырим лэч туй вылö, быттьö ставыс югзис, быттьö кутшöмкö аддзытöм вын кутіс отсавны да кокньöдны мунöмнымös. Медводдза жö лэчкас вöлі пысасьöма сьöла.

- Тайö, көнкö, ыджыд батьöй нимкодьясьö да отсалö. Лоö на пö кодлы менам угоддьöясöд ветлыны, - мөвпышти ме. – Ог кө ме, сэсся коді?

И ме сеті ыджыд батылы кыв, мый бытысь велөдча пуктавыны лэчьяс, сёр лэчьяс, качана лэчьяс да кута старайтны сылысь лэч туйсö. А бать менö велөдас ставас, мый кужö ачыс.